




Broj 03-33- 14154/26 (A.S)   
Zenica, 22.06.2026 godine

## **SAOPĆENJE ZA JAVNOST**

### **Pacijentima u Zeničko-dobojskom kantonu omogućeno brže ostvarivanje deficitarnih zdravstvenih usluga**

U cilju unapređenja dostupnosti zdravstvene zaštite i smanjenja listi čekanja, Zavod zdravstvenog osiguranja Zeničko-dobojskog kantona, u saradnji sa Javnom ustanovom Kantonalnom bolnicom Zenica, te uz podršku Ministarstva zdravstva i Vlade Zeničko-dobojskog kantona, uspostavio je novi model realizacije deficitarnih zdravstvenih usluga. Riječ je o značajnoj reformskoj mjeri koja osiguranim licima omogućava brži pristup dijagnostičkim pregledima i efikasnije ostvarivanje prava iz obaveznog zdravstvenog osiguranja.

Nakon što je Ministarstvo zdravstva ZDK donijelo Odluku o utvrđivanju Liste deficitarnih zdravstvenih usluga za 2026. godinu, Zavod zdravstvenog osiguranja Zeničko-dobojskog kantona proveo je postupak javnog poziva koji je bio otvoren za sve zdravstvene ustanove koje su ispunjavale propisane uslove. Sa svim zdravstvenim ustanovama koje su se prijavile na javni poziv i ispunile kriterije utvrđene javnim pozivom, Zavod zdravstvenog osiguranja Zeničko – dobojskog kantona je zaključio ugovore o pružanju deficitarnih zdravstvenih usluga, čime je osigurana šira mreža pružalaca zdravstvenih usluga i veća dostupnost dijagnostičkih pregleda osiguranim licima. Primjenom nove procedure pacijentima kojima je u Kantonalnoj bolnici Zenica termin za određenu deficitarnu zdravstvenu uslugu zakazan u roku dužem od tri mjeseca omogućava se da istu zdravstvenu uslugu obave u drugoj ugovornoj zdravstvenoj ustanovi, uz finansiranje od strane Zavoda zdravstvenog osiguranja Zeničko – dobojskog kantona.

Na ovaj način uspostavlja se efikasniji sistem upravljanja listama čekanja, racionalnije se koriste raspoloživi zdravstveni kapaciteti, a pacijentima se omogućava pravovremena dijagnostika, što predstavlja jedan od ključnih preduslova za uspješnije liječenje i očuvanje zdravlja.

Pacijente koji ostvaruju pravo na korištenje ove mogućnosti kontaktirat će nadležne službe Kantonalne bolnice Zenica, koje će ih informisati o daljnjoj proceduri i izdati potvrdu o zakazanom terminu pregleda. Nakon preuzimanja potvrde (na čijoj poledini se nalazi spisak ugovorenih zdravstvenih usluga i ugovorenih zdravstvenih ustanova), pacijent samostalno bira jednu od ugovornih zdravstvenih ustanova u kojoj želi realizovati zdravstvenu uslugu, čime se dodatno unapređuje pravo osiguranika na izbor pružaoca zdravstvene zaštite.

Prilikom realizacije zdravstvene usluge potrebno je dostaviti uredno popunjenu potvrdu o zakazanom terminu pregleda, kao i originalnu uputnicu za Kantonalnu bolnicu Zenica izdatu od nadležnog porodičnog ljekara. Po obavljenoj zdravstvenoj usluzi, ugovorna zdravstvena ustanova preuzima obavezu kompletiranja potrebne dokumentacije i njenog dostavljanja Zavodu zdravstvenog osiguranja ZDK radi realizacije ugovornih obaveza.

Ugovori su zaključeni sa više javnih i privatnih zdravstvenih ustanova koje će pružati deficitarne dijagnostičke usluge, uključujući ultrazvučne preglede srca, kolor dopler krvnih sudova, ultrazvučne preglede vrata, periferije i dojki, kao i CT dijagnostiku sa i bez kontrasta.

Za pacijente koji odaberu zdravstvenu ustanovu izvan područja Zeničko-dobojskog kantona osigurano je i pravo na naknadu troškova prijevoza u visini cijene povratne karte javnog prijevoza, čime se dodatno olakšava pristup potrebnim zdravstvenim uslugama.

Ova mjera predstavlja značajan iskorak u unapređenju zdravstvenog sistema Zeničko-dobojskog kantona i potvrđuje opredijeljenost Ministarstva zdravstva ZDK i Zavoda zdravstvenog osiguranja ZDK da, kroz konkretne reformske aktivnosti i efikasnije korištenje raspoloživih zdravstvenih resursa, osiguranim licima omoguće brži, kvalitetniji i dostupniji pristup zdravstvenim uslugama. Istovremeno, očekuje se značajno rasterećenje postojećih listi čekanja u Kantonalnoj bolnici Zenica, efikasnije korištenje zdravstvenih kapaciteta i podizanje ukupnog kvaliteta zdravstvene zaštite na području Zeničko-dobojskog kantona.

**DOSTAVLJENO:**

① x mediji (putem e-mail)  
1 x a/a

